

Banyak lagi isu kepentingan negara, parti akan disentuh

KUALA LUMPUR 13 Nov. - Datuk Seri Abdullah Ahmad Badawi tidak menolak kemungkinan akan membangkitkan isu kritikan Tun Dr. Mahathir Mohamad terhadapnya dan kerajaan dalam ucapan dasar Presiden semasa perasmian Perhimpunan Agung UMNO pada hari Rabu.

Perdana Menteri berkata, beliau mempunyai banyak isu yang ingin disentuh, dan berjanji akan membawanya dalam ucapan dasar Presiden.

"Tunggulah ucapan saya (ucapan dasar Presiden), ada banyak lagi perkara lain yang akan saya bangkitkan," katanya kepada pemberita setelah menyampaikan Taklimat Presiden kepada lebih 2,000 per-

wakilan sempena Perhimpunan Agung UMNO ke-57 di Pusat Dagangan Dunia Putra (PWTC) di sini hari ini.

Mengenai taklimat yang diadakan secara tertutup itu, Abdullah yang juga Presiden UMNO menjelaskan beliau tidak membangkitkan isu kritikan Dr. Mahathir kerana beliau mempunyai banyak isu lain yang hendak disentuh.

"Banyak perkara yang telah saya sentuh (dalam amanat) yang menjadi isu, termasuk pasal ekonomi dan pasal projek

"Pasal ekonomi tidak bergerak... kalau Tun (Dr. Mahathir) tidak sentuh, saya tetap akan bangkitkan (pada Perhimpunan Agung) kerana ia penting untuk mem-

beri kefahaman kepada parti," tambah beliau.

Perdana Menteri juga menegaskan, semua perwakilan bebas membangkitkan sebarang isu pada perhimpunan kali ini, termasuk berhubung kritikan Dr. Mahathir terhadap kepimpinannya dan kerajaan.

Menurutnya, UMNO tidak menyekat mana-mana perwakilan daripada membahaskan sebarang isu termasuk kritikan yang dilemparkan oleh bekas Perdana Menteri itu.

Abdullah, bagaimanapun, mengingatkan semua perwakilan yang mengambil bahagian dalam perbahasan supaya me-

matuhi semua peraturan persidangan.

"Kita tidak hadkan atau menyekat sesi-apa hendak bangkitkan apa-apa juga perkara termasuk isu mengenai kritikan Dr. Mahathir (terhadap kerajaan dan Perdana Menteri).

"Tetapi ia mestilah dalam lingkungan yang ditetapkan oleh persidangan dan tatasusila serta peraturan parti," tambah beliau.

Abdullah berkata demikian ketika ditanya apakah Perhimpunan Agung UMNO 2006 menetapkan peraturan melarang perwakilan membahaskan isu kritikan Dr. Mahathir terhadap kerajaan dan Perdana Menteri.